

畿輔通志卷一百七十六

略一百三十一

古蹟二十三

祠宇二

承德

永平

河間

天津

正定

順德
廣平

承德府

夏巡檢祠在三官廟內祀熱河巡檢上虞夏熙以浚渠有功

士民德之乾隆三十九年建祠海忠撰祠記

府志

平泉州

遼祖廟中京大定府皇城中有祖廟景宗承天皇后御容殿

遼史地
理志

聖宗開泰八年正月建景宗廟於中京九年十二月

詔中京建太祖廟

遼史聖
宗本紀

遼祖廟在故大定府城內今無存

府志

豐甯縣

蘇武廟在縣之大閣兒四道河東十七里地名蘇公廟是也

府志 國朝金虞和莊園題蘇武廟用壁間茶字韻詩青塚明妃共一家至今遺廟傍天涯少卿別後如中酒通國歸來似小茶妙茶齏入畫麒麟終慘淡寄書鴻雁漫咨嗟銀沙萬里忠魂在迴樂峯前看月華又疊茶字韻詩節毛落盡竟還家廟食無涯歲有涯瀚海牧羝終化乳漢庭歇馬未通茶從征客過應長歎疥壁詩傳亦可嗟絕調千秋首蘇李莫將輕翰染煙華

朝陽縣

高雲廟馮跋太平二年立高雲廟於韭町置園邑二十家

北燕

錄

韭町在故龍城今無考

府志

永平府

盧龍縣

清節廟在縣西二十里孤竹故城祀伯夷叔齊舊廟久廢

元馬

祖常重修清聖廟記大元建國全燕以御華夏永平爲甸服股肱郡至元十有八年世祖皇帝甫平江南五歲矣卽裏于

戈放馬牛而不用大召名儒修禮樂之事勅有司咸秩無文
於是永平郡臣以其邦爲孤竹舊壤伯夷叔齊兄弟讓國之
所也列狀以請大臣以聞上曰其令代言爲書命以褒之謚
曰清惠於惠於今又五十年矣郡臣前後又不知幾許人矣
茲者某年某官等乃狀上書曰郡境廟像清惠仁惠之神歲
無牲牢祭品不備領祀無官尙書秩宗有禮有儀謹以告其
日會太常議制曰丞相府符下永平曰夷齊求仁得仁廟食
固宜歲春秋蠲吉具儀有司行事符具署矣乃重白丞相府
以孟軻稱伯夷聖之清孤竹其宗國也今旣像設而廟食之
宜以清聖顏廟丞相府僉曰允哉嗚呼大道之鬱也則民烏
得而知古焉士蓋有一二世不知其傳者大道之彰也則民
不識金革戰鬪之暴內則有父子夫婦相與飾於禮節外則
有官師之教朋友之交相與講於古豈獨知己之所傳又知
當世之名世者而傳之是則永平府之遭逢國家之隆而沐
浴大道之彰也吾將見行者讓途耕者讓畔學士相讓於俎
豆工商相貸以器貨而市價不貳矣推本我世祖皇帝教化
之意顧不由此與邦之人尙厲其志而施於行哉毋徒神之而已也

內東北隅景泰中復建於此

明商輅清節廟記成化九年癸巳前監察御史知永平府事臣

璽言永平郡實孤竹舊壤伯夷叔齊所生之地也夷齊兄弟
遜國而逃節義凜凜雖百世猶一日故孔子稱其仁賢孟子
稱聖之清迨夫宋元加以封爵至我朝洪武初再飭祠祀歲
久祠圯祀亦尋廢事載大明一統志可考見已竊惟表章前

賢風勵邦人臣之職也因謀諸同官捐俸倡義鳩工歛材重建正堂三間翼以兩廡門二重神庫廚齋房爲間各三肇役初是歲春三月至秋八月落成廟有餘地數百畝以付居民侯王等種之歲收其租之入供祀事伏惟皇上追念二賢生平節義賜以廟額庶幾永終弗墜臣璽昧死以請制曰可賜額清節並降祀冊命守臣春秋行事如儀恩典渙頒軍民胥悅於是守具事狀加書介郡人通政司掌司事兵部左侍郎張文質屬輅爲記謹案孤竹有國封自殷湯傳至伯夷之父墨胎氏將死遺命立叔齊叔齊遜伯夷伯夷曰父命也遂逃去叔齊亦不立而逃之蓋伯夷以父命爲尊叔齊以天倫爲重其遜國也皆求所以合乎天理之正而卽乎人心之安誠有功於世教如孔孟之所稱道是已夫有功世教雖天下猶將祀之况宗國乎太守此舉可謂知所重矣是宜朝命允俞禮秩有加自今二賢節義益以表白於世殆見遜讓成風民德歸厚由近以達遠舉一以勸百夫豈小補云乎哉噫邦人士毋徒以祠祀視之則善焉用書以爲之記王世貞弔夷齊文盧龍故孤竹也城西有伯夷叔齊祠吳人王世貞奉使過此酌水酌焉而爲之辭曰予奉輜以東逝兮東馬放乎令支山巘崘而嵬嶪兮衆草贅藿而條緯俞院道余於卑耳兮武夫磷磷其參差曰青帝之握樞兮顓改煦浹寥而潛懷立宮承雲而躡靄兮僉告余二子之所都美回慮以返照兮洪忍躊躇靡而內疑足次且欲卻兮又雀躍而前趨段舍光劇余之素兮挽清泠使濯余之威褻招沆瀣以醢醢兮裏朝霞以爲餽餽噓元冥之竅機兮噫噫拊歌之擴捨受哀絃於太娥

兮捐延和之以清商靈蕭蕭而若覩兮冀回魍燭乎微躬又
倘況其不可卽兮掌夢疏帝以奚從眺孤竹之賈曼兮臺要
靈以故祔生剽舉而脫屣兮甯鬱鬱處彼幽方溟波委輪濺
貉兮箕蒙難而延宗靈庶偕以期遊兮語侏離而不可通北
泱泱靈所辟兮受淳涵使不得甯將岐豐沃以愉兮靈又薄
周德而莫宮諸毗綿延具區兮太虞夷猶於其旁羌德配而
耦娛兮靈謂狎附乎周盟陂陀首陽忽巋嶸兮益徽以荃之
芬芳靈閭闔而下臨兮將綬駕以憩息掌夢申申以表誠兮
豐隆臾而來假霓車殷殷以翩繽兮皎雙鴻之次翼匪寶璐
而陸離兮含薤芷以彌馥介九賓而見予兮祝史要予以靡
忒伯從父以成命兮叔違親以成德俶舍君以明志旣殉主
以明極昔巢許之讓皇兮託勳華而稍佚尹五就而拯塗兮
愀然面故主以惶怵謂題跂以死名兮莊任誕而廢節遷曉
噍於驥尾兮嗜微聲之有託彼纍脩辭而求白兮卒半怪沈
乎湘澤繹鄒人之無怨兮迺從容於天則世滔滔而茫漏兮
戰伐莽其相仍顧蒿目以挨撫兮競合沙而盡光騶虞仁以
伏食兮於菟誇咀夫衡生陽鱗之齧纖鱗兮偃蜺神龍以自
矜靈旣悼農虞之忽沒兮氓躑躅而殷慕愧突梯之苟容兮
將捐足乎靈御胡司命之不晰微兮抑舖糟
以昏驚盼嫋娥之要眇兮捐濁軀而不及顧
康熙四年知府

彭士聖重修

古孤竹採薇二子起商季遜國叩馬清節萬古

大清一統志 彭士聖重修廟記略永平屬

爲昭今清節祠留洞山之陰俯臨灤水予王寅來守春秋例
得率屬致祭是夏范公承祀園陵東旋追陪清風臺

上紀之以詩目擊祠圯實維有司咎祀不祀固無與於二子而稽自漢熹平五年已有祠唐天寶七載祀義士八人於郡縣崇祭則自此始宋大中祥符四年會訪廟遣官致祭清惠仁惠諡號則封於政和三年進侯加公則更於元至元十有八年至順元年頒廟額曰聖清古廟久廢會移於郡城內東北隅爲明洪武九年郡丞梅珪所建未幾復廢景泰五年郡守張茂乃重建於孤竹故城成化九年郡守王璽請於朝賜今額御定祭文詳載元中丞馬祖常明學士商輅兩記甚著弘治十年郡守吳傑重修有行人張廷綱記之嘉靖二十六年郡守沿此重修規制大備有侍講袁煒記之四十二年備兵使者溫景葵始於廟北隅隔河建孤竹君廟隆慶六年郡守辛應乾萬曆十一年兵備雷以仁郡守任愷二十七年郡守徐準曹代蕭等皆經重修代蕭且復同給諫白瑜輯夷齊志夷齊有功世教惡可聽置俎豆不光爰謀諸寮屬咨於士民精黍爲鉢延至甲辰夏尙未及千金待鳩工庀材卜吉啟土不期大雨灤漲平城道沒弗克往又越月餘水退口外衝入木植集廟下有如夙購伐至計獲命工度之已贏止需磚瓦灰釘並匠作食用因以所募金催濟俾盧龍李令守掌擇鄉耆督工經營論廟制規模弘鉅非數千金不可用力少而程工易所賴浮木居多時會相值似亦有神助云是役也工肇於康熙三年甲辰夏閏六月至十月終粗完迨寒暫輟越明年乙巳春融加以丹雘四月旣望迄用告竣門樓殿堂臺廡庫廚齋房咸撤易煥然一新其孤竹君廟就毀恐墨胎父子異視未安矧茲土實此君舊服是應相繼修復往雖有廟

戶恒別處朝夕不之顧尙或利其木石而反侵損之舊存地籍固可考多被隱估清出擇僧居守本不宜用浮屠藉司香火歲以租供祀事並食之庶不致斯廟無守而仍爲曠廢也予乃進邦人而告之曰爾思享福曷若遠禍禍幾實兆於爭止爭莫善於讓爾邦人噓被其清風已久今新其廟歲時伏臘瞻拜其前仰而思爾邦之前人爲子如是爲臣如是爲兄與弟又如如是卽當自審爾宜何如爲子爲臣爲兄爲弟縱不能比節致謹而試先師其讓始而雍容於門內繼充此操於鄉黨朋友之間無不以遜讓相期廉隅共砥自然訟獄衰息室家和平內侮不生外患不作於此鼓腹康衢優游盛世以載揚神休誰謂祭不獲福

范文程孤竹城夷齊祠記先文

命東出郵厯永平灤

勤焉敬而繕之必有取也予奉

河高岸荒祠一區知爲夷齊祠以孤竹之人而祠其地之曩賢自非不典之祀歟惜其凋圯有如此時二千石某君在側前而曰官斯地者與有責焉其新之乎予曰以夷齊之賢詎有俟於表章者祠不祠可也葺不葺亦可也未幾而予啟關去役竣復經其地遙見祠前若有般倅之徒矻矻從事者時二千石某君在側前而曰官斯地者胥有蠲焉其新之矣旋以記請予曰以夷齊之賢詎有俟於表章者祠之葺不葺可也葺矣記不記亦可也未幾而予命轡來今年某月工果竣復以記請予嘉其有是役也爲述其往來目覩有如此且其記略云啟工時天大雨河水漂來材木大小稱祠用故事半而功成謂神爲之乎抑人爲之乎若曰夷齊之靈則斷斷乎

其誣也事頗不常故附筆及之 國朝陳延敬夷齊廟詩清
聖祠堂滄海邊首陽往事尚依然崢嶸泰伯與周日寂莫成
湯放桀年萬世君臣今論定古來兄弟幾人傳只將一勺灤
江水埒取山薇薦豆籩 方觀承謁清節廟詩清風留片碣
孤竹有高臺北海身同潔西山事可哀薇香庭
舊植松老徑新開千古平灤曲山川絕點埃

孤竹君祠在清節廟北隅河之滸明嘉靖四十二年兵備溫

景葵建 雍正志

李將軍祠在縣南八里虎頭石下祀漢李廣 康熙志

表忠祠在府武學戟門左祀明崇禎己巳死難兵備道張春

庚午死難兵備道鄭國昌知府張鳳奇推官羅成功及紳民

共四十四人今圯 府志

忠烈祠在府武學戟門右祀明崇禎庚午死難武學科正唐

之靖道標中軍程應琦營路參軍焦慶延 同上明劉景曜祠碑記畧永之有

忠烈祠也科正李江為唐程焦三公而建者也三公當口犯
內地能從容就義視死如餌凜然如出一轍唐則先令舉家

自焚因謂左右曰吾死之後亦焚吾屍勿中口口遂更衣西
向再拜自縊程拔所佩刀自刎不死令家丁斷頸眾涕泣勸
慰程暨髮裂眦復起自殺焦則持長矛血戰死鋒鏑骸骨竟
無人收噫亦烈矣李子捐金四十募三十爲之立祠於武學
戟門之右隙地而又還贍田四分之一以永厥祀誰謂今無
祠哉唐公之靖古越山陰籍以會舉第二人官武學科正程
公應琦與唐同邑以武闡三捷任道標中軍焦公慶延盧龍
世胄歷營路參軍不佞感三公之忠節多李子之義舉輯其
事實姓名勒之
於石以識不朽

韓御史祠在府東郭外天仙廟左祀韓應庚有黃文旦撰鈞

臺祠堂記

同上 國朝宋琬懷德祠記余讀史至韓獻子世
家嘉其有存趙武之功太史公稱其爲天下之陰

德享祀十世有以哉盧龍韓氏蓋多君子而侍御西軒先生
以名德聞考其先自晉平陽遷也先生起家萬歷丁丑進士
爲御史有聲解組歸果徵不起隱於釣臺者三十年余嘗徘徊
其下竊臆先生殆古狂狷者流旣已不爲世用矣故放乎
山水以自娛已而過東門之墟有堂巋然曰懷德祠詢之人
先生之畏壘也先是郡城東南隅盡污萊也先生用形家言
建天妃宮於其方於是鄉人德焉以其餘材作室肖先生之
像而祀之他如置學田以贍貧士輸困廩以活飢人掩飢施
樽餽糜授藥父老至今能言之相與咨嗟涕泗過其下者輒
流連不能去云宋子曰嗚呼賢者之繫人國家也豈不重哉

昔者臧文仲沒魯人哀之子皮之死子產歎其無與爲善先生抱經世之才不獲施用於當世退而爲德於鄉亦豈望後人之俎豆口我哉而夷考盧龍自庚午被創以來問當時闕之冢口尙有存者乎非若散之飯則樂盈之敗甚且有行殯其宮室者而先生之子孫獨能保世滋大蔚有令聞是不駸駸乎獻大夫之遺烈哉且夫先生懸車之歲在明神宗之中年也上恬下熙災變罕有然而歲一不登先生輒口然憂之今盧龍之可憂者非一端而足也士有蕩析之口氓有采蓄之困千金之家有句於市者矣凡民之喪有口而裸者矣使先生而在則必有蒿目傷心發爲救時之策而惜也九原不作民罕依歸官先生之里者靡所咨故實而爲政焉傳曰不有君子其何能國宜乎豚肩兔首勞邦人之伏臘也祠之修始於萬厯甲辰歲順治庚寅陳公宏業乃更葺之從先生祀者仲氏南軒公季氏東軒公從子觀察鵬南公隱君發西烈士開西皆先生之子而賢故並附焉先生名應庚字希白號西軒父子兄弟各有傳載韓氏家乘中先生之孫鼎業隱於中州來修祀事請余爲口口口口俾後人有所考焉

李布政祠在府東北祀明李充濁

同上

晏公祠在府城東北隅祀知縣晏賓

同上

魏公祠在府南二里南臺古寺祀知縣黃岡魏段康熙十三

年建王基文撰祠記

同上

遷安縣

三忠祠在縣西北景忠山上祀諸葛武侯岳武穆文信國

大

清一

統志

崇報祠在三屯營新鼓樓東祀明總兵戚繼光

康熙志

馬公祠在三屯營景忠山下祀邑人總兵馬永

同上

忠烈祠在建昌營西北祀明陣亡副總兵蔣承勳

縣志

遺愛祠一在縣南關祀明知縣張廷拱一在城南街祀明知

縣王羅俱久圯同治十三年知縣韓耀光建祠於書院合祀

知縣王餘菖張恩溥張夢蓉

同上

蠶姑廟在縣城西二十里

雍正志 李成性考正記畧遷邑之西三十里曰平頂山邑城之西

五里曰灤河河西十餘里到山十里曰蠶姑廟莊以廟名廟之來蓋久矣廟主神女像三南向塑女嬪二左承蘭右奉絲

次一判一鬼列侍焉其爲蠶姑彰彰也廟原在莊南歲久傾圯移置莊東卽今廟址是也正月上元修祀事四鄉之士女咸往焉萬厯中廟復圯鄉人侯繼文會衆再新之中堂像如故於左右兩室間增眼光子孫二像廟中浸失其舊然猶祀以上元蠶姑之名未沒也邇來歲浸久鄉愚習見眼光子孫二像在泰山行宮中遂以四月十八日祭賽之蠶姑之名設而祀湮矣予爲此懼搜采稗乘見農桑雜錄云四孟之年大姑把蠶四仲之年二姑把蠶四季之年三姑把蠶乃知三姑蓋三處女姊妹共職蠶事者聞之眞定亦有此廟神像相同正月上元日則祭四月挂絲則又祭於祈報之義甚明然則世俗所稱馬頭娘乃蠶姑之始化也荒史所稱黃帝命元妃西陵氏教民蠶乃蠶之始育也三姑分歲主運乃代天地化育之功以衣被萬世者也其績實與后稷烝民乃粒者等在在宜尸而祝之以不忘衣食之源本豈可以邊地不蠶廢沒其湮祀也哉予恐失其本以正厥事勒之於石以備鄉之後來者取徵焉 張大復蠶姑廟詩桑柘陰陰村景幽藕花共道盛中洲遠香覆水迎人面濃綠遮檐祀馬頭對我亭亭當芷岸與誰采采泛蘭舟溯洄那意清波阻一望蒼煙素練浮

撫甯縣

王公祠在縣城內東南隅舊在西門內後移此祀明知縣王

臺

縣志 明莊奇顯祠記略撫甯王侯諱臺號古柏山東清原人萬厯四十二年除撫甯令薦卓異者數次越六年遷

揚州府同知去撫之日士若民如赤子之失母也攀緣二百餘里至豐潤涕泣而回曰何日再見侯乎於是繪侯像建祠祀之不敏過撫甯而敬服焉越四年撫之士民束帛陳實求一言於余勒之石以垂侯政於不朽不敏肅容而問曰王侯何政而感人之深如此士民作而對曰侯撫民以仁訓士以禮賦役從輕刑罰從寬約束吏胥裁革冗役禁梏蒲繩左道問疾弔喪表揚節孝者湯糜以活饑民立保甲以資武備創書院建魁樓置社學以興文教朝勤夕惕百廢俱舉此侯撫綏之政也復修山石邊牆二千六百餘丈建臺三十餘座烽墩一十有四此又侯濟變佐時之政也不敏聞而歎曰侯撫民勤苦如此又能佐時之變可謂盛世之循良而籌邊之利器矣世人以沉竈產蛙爲城守功不敏獨以爲綢繆未雨如王侯之功更大耳士民愛如父母戴如天地敬如神明有由然矣是爲記

許公祠在縣城西河南祀知縣許夢蘭

同

昌黎縣

李臨淮祠在縣西城上祀唐司徒李光弼

康熙志

韓文公祠在縣西北明洪武中建嘉靖五年知縣秦廷銳重

建

縣志明翟鑾重修文公祠堂記昌黎縣治之東北隅故有文公祠宇在焉我太祖高皇帝龍飛初年建也茲百六

十載楹桷摧毀丹青漫漶且制度卑隘享祀弗稱無以上慰
 聖祖崇重成祿之典歲在丁酉山西柱史景君溱按厯其地
 瞻拜慨然曰觀風首事景行莫先焉遂屬永守劉君隅郡憲
 柯君喬拓地易材鼎新其制越數月而告成乃走倅京師徵
 予爲文以記歲月余讀唐書考公世系南陽鄧州人昌黎本
 源地也高祖以上實葬於斯其在鄧七世祖茂後魏以功封
 安定王蓋以功名顯其在唐諸父雲卿銘誌擅聲大厯擇木
 書法媲美陽冰滂湘輩文學及第相望於時蓋以文章顯植
 本發源茲地之靈信不可誣國初肇建祠宇不於南陽而於
 昌黎聖祖真有見哉顧歲久則敝敝斯忘方今浮屠淫祠徧
 天下金碧莊嚴四方士女爭致金錢日夕奔走顧名賢之區
 視若疣贅或存或敝恬若不聞然則侍御君景仰向友之心
 端不可及宋儒論公文起八代之衰此記體裁之華實耳若
 闕邪輔正左右六經羽翼聖軌與孟軻氏相表裏豈託諸空
 言無益理道者同日語哉又公忠勳法應祀典唐穆之世藩
 服不庭攻圍制師公奉命往諭君臣上下莫不危公公開諭
 忠梗卒折其逆將而出我王人是公一時之功賢於四節度
 之師勞孰甚焉夫以公經世之文定亂之勇崇德報功萬世
 血食可也茲廟貌一新梓里對峙九泉之下公必神遊其處
 矣侍御君望重山嶽百廢俱興崇植風教急先務矣太守君
 幼篤志學與郡憲君昔以前柱史來涖是邦是故相與以有
 成也未幾皆遷秩去嗣守郡憲錢君嶠方以柱史徵迺諸君
 用心之勤遂愆惠襄其事樂善之心咸可嘉尙也已 附舊
 府志昌黎考韓文公多自稱昌黎及宋元豐七年封公爲昌

黎伯迨元末而今之昌黎有祠考之唐書本傳公爲鄧州南陽人魏安定桓王茂之七世孫而韓氏宰相世表言漢弓高侯頽當之裔世居潁川徙安定武安九門而生安定桓王與昌黎之韓文派各別故昔之論者猶疑之以爲唐人多稱郡望如言劉悉出彭城言李悉出隴西之比也以史稱之韓擇木封昌黎伯矣韓長鸞韓建封昌黎王矣疏封之典取名於本望自是唐朝之例而韓氏之宗最有名於北朝如麒麟顯宗者史明言爲昌黎之棘城又非今之昌黎也然則文公之沒二百六十年而始封昌黎伯又一百六十年而始置今之昌黎縣今昌黎之於文公其有當乎曰不然蘇子瞻有言公之神在天下者如水之在地中無所往而不存也學者之仰文公如泰山北斗尊之斯親之親之斯效之以其名而存之曰公亦吾鄉之人也庶有勸於後之爲學者乎是或一道也又按文公之非今昌黎縣人舊府志考證精確議論中理無庸贅辨其末謂以其名而存之於理尤慊今天下郡縣無以昌黎名者而此縣專其名則此縣即可奉其祀況祠建於明洪武四年其來久矣至范公志完又置祭田立承祀彼時必考明文系確爲文公之裔由南陽而轉徙於此地所以後有奉祀生之設且案唐韓氏宰相世表公出北魏安定桓王茂此支世居潁川後徙安定武安九門則文公自上世以來不特非今昌黎縣人卽古之昌黎其地亦非其桑梓唐人最重族望王必耶耶李皆隴西原非實居其地是文公當日之自稱昌黎亦特取其名耳公昔以名稱之今卽以名祀之誰謂不宜但列之於鄉賢進士則名實舛謬乃大不可河南孟

縣志載文公家之墳墓宗支最詳舊縣志止知文公之為進士而不知其他其亦可以不必矣文公已以先儒祀兩廡今專祠可矣亦不必降列於鄉賢也案文公舊唐書傳云昌黎人新唐書傳云鄧州南陽人劉昫於文公頗不推重尙譏諱辨毛穎傳爲尤紕繆則昫之學問淺陋可見且文公父仲卿曾官縣令李白爲作去思碑詳列仲卿弟兄名人爲校書郎乃舊唐書言父仲卿無名位疎漏如此何足爲據新唐書宋子京雖據皇甫湜神道碑而誤加鄧州不知所稱乃古南陽河陽河內修武皆其地左氏傳所謂晉於是始啟南陽者而非唐之鄧州南陽也河陽今孟縣文公七世祖北魏安定桓王茂墓在孟縣北二十里尹村子孫從葬者甚多文公子和自作墓誌銘韓綰所書卽於此地出土文公墓在縣南十三里韓莊後乾隆四年高宗純皇帝遣侍郎鶴年諭祭公墓立世襲五經博士世以奉文公祭祀舊志所謂文公高祖以上墓在此亦謬也按韓湘乃文公姪孫爲公姪老成之子文公兄弟三人長會官秘書謫南方無子次介二子長百川次老成出嗣會老成二子長滂十九歲早卒次湘舉進士官大理丞墓在孟縣摘星村西

拽梯郎君祠在縣東月城以拽梯全城明崇禎巡撫楊嗣昌

疏建今廢附祀於忠義祠縣志 國朝顧炎武撰祠記忠臣義士性也非慕其名而爲之名者

國家之所以報忠臣義士也報之而不得其名於是姑以其事名之以爲後世之忠臣義士者勸而若人之心何慕焉何

憾焉平原君朱建之子罵單于而死而史不著其名田橫之二客自剄以從其主而史并亡其姓錄其名者而遺其晦者非所以爲勸也謂忠義而必名名而後出於忠義又非所以爲情也余過昌黎其東門有拽梯郎君祠云方東兵之入遵化薄京師下永平而攻昌黎也俘掠人民以萬計驅使之如牛馬是時昌黎知縣左應選與其士民嬰城固守而敵攻東門甚急是人者爲敵昇雲梯至城下登者數人將上矣乃拽而覆之其帥磔諸城下積六日不拔引兵退城得以全事聞天子立擢昌黎知縣爲山東按察司僉事丞以下遷職有差又四年武陵楊公嗣昌以巡撫至始具疏上請邑之士大夫皆蒙褒敘民兵死者三十六人立祠祀之而楊公曰是拽梯者雖不知何人亦百夫之特乃請旨封爲拽梯郎爲之立祠嗚呼吾見今日亡城覆軍之下其被俘者雖以貴介之子誦之士且爲之刈薪芻拾馬矢不堪其苦而死於道路者何限也而郎君獨以其事著吾又聞奢寅之攻成都也一銃手在賊梯上得間向城中言曰吾良民也賊以鐵索繫我守梯我仰天發銃未嘗向官軍也今夜賊飲必醉可來救我官軍如其言夜出斫營火其梯賊無得脫者而銃手死矣若然忠臣義士豈非本於天性者乎郎君之祠且二十餘年而幸得不毀不爲之記無以傳後張生莊臨親其事者也故以其言之

忠義祠在縣北祀守城殉難四十人明巡撫楊嗣昌建

康熙志